



## **TEKS UCAPAN**

**YB HAJAH AIMAN ATHIRAH BINTI SABU  
TIMBALAN MENTERI PEMBANGUNAN WANITA, KELUARGA DAN  
MASYARAKAT**

**PROGRAM JERAYAWARA KASIH KPWK  
@ADVOKASI ANTIGANGGUAN SEKSUAL NEGERI TERENGGANU**

**KUALA TERENGGANU, TERENGGANU  
10 SEPTEMBER 2023 (AHAD) / 11.00 pagi**

Bismillahir Rahmanir Rahim

Assalamualaikum Warahmatullahi Wabarakatuh,  
Salam Sejahtera dan Salam Malaysia Madani.

**(SALUTASI)**

**LAMPIRAN SALUTASI DISEDIAKAN**

## PENDAHULUAN

1. Alhamdulillah, Segala Puji Bagi Allah SWT, Tuhan sekalian alam kerana dengan limpah kurniaNya dapat kita berkumpul pada pagi ini dalam **Program Jerayawara Kasih KPWKM @Advokasi Antigangguan Seksual Negeri Terengganu.**
2. Pertama sekali, saya ingin menyampaikan setinggi-tinggi penghargaan dan ucapan terima kasih kepada semua Ketua-Ketua Jabatan Kerajaan Negeri Terengganu dan

Kerajaan Persekutuan, badan-badan korporat, persatuan majikan dan sekerja, pertubuhan bukan kerajaan (NGO) serta rakyat Negeri Terengganu yang turut hadir pada pagi ini.

3. Sesungguhnya, kehadiran tuan-tuan dan puan-puan pada pagi ini **menunjukkan solidariti, sokongan** serta **kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.**

## **LATAR BELAKANG**

Puan-puan, tuan-tuan, hadirin yang saya kasihi sekalian.

4. Isu gangguan seksual harus ditangani dengan serius. Oleh itu, kita perlu sentiasa menambah baik undang-undang semasa agar sesuai dengan peredaran masa. Kini, gangguan seksual bukan sahaja berlaku secara fizikal tetapi juga dalam talian atau *online*.

5. Walaupun masalah ini bukan perkara yang mudah untuk ditangani, adalah sangat penting dan mustahak untuk kita menguar-uarkan dan teruskan perbincangan **isu gangguan seksual serta isu jenayah intip dan hendap atau 'stalking'**.
  
6. Salah satu cabaran dalam menangani gangguan seksual ialah apabila terdapat sesetengah pelaku mungkin menganggap tindakan mereka sebagai jenaka yang tidak berbahaya atau salah faham. **Ingin saya tekankan di sini, seharusnya tiada ruang langsung diberikan kepada**

**gangguan seksual, sama ada secara terang-terangan atau jenaka.**

7. Kesan kepada mangsa tidak terhad pada gangguan mental sahaja dan mendorong kepada jenayah seksual yang lebih serius. Jenayah ini memberi kesan secara langsung terhadap mangsa dan membawa kepada kesan trauma dan ketakutan yang berpanjangan.

8. Menurut statistik yang dilaporkan oleh Polis Diraja Malaysia (PDRM), jumlah kes gangguan seksual yang dilaporkan meningkat dari **378 kes pada 2020 dan seterusnya meningkat kepada 506 kes pada 2021**. Walau bagaimanapun, terdapat **sedikit penurunan pada tahun 2022 iaitu kepada 477 kes**. Jumlah kes yang dilaporkan ini melibatkan kedua-dua jantina, iaitu lelaki dan wanita.
  
9. Namun, majoriti mangsa adalah kaum wanita iaitu sebanyak **354 kes pada tahun 2020, 446 kes pada tahun 2021 dan 416 kes pada tahun 2022**. Statistik ini menunjukkan bahawa setiap



tahun lebih **90 peratus** daripada kes gangguan seksual adalah melibatkan mangsa dalam kalangan kaum wanita.

10. Bagi Negeri Terengganu sendiri, pada tahun 2022, **terdapat 14 kes gangguan seksual di mana 12 kes atau 85 peratus adalah melibatkan gangguan seksual terhadap kaum wanita.**
11. Selain itu, kes gangguan seksual yang melibatkan kanak-kanak juga adalah membimbangkan iaitu berjumlah **35 kes pada tahun 2022 di seluruh negara.** Negeri Terengganu juga

turut mempunyai kes gangguan seksual yang melibatkan kanak-kanak iaitu sebanyak 1 kes.

12. Statistik ini menunjukkan bahawa gangguan seksual boleh terjadi di mana – mana sahaja, dalam apa jua bentuk dan kepada mana-mana individu tanpa mengira jantina, usia, kaum ataupun agama termasuklah kepada **golongan yang tidak berdaya seperti kanak-kanak.**

13. Kerjasama semua pihak sama ada ibu bapa, guru-guru, jiran tetangga serta seluruh lapisan masyarakat berperanan melindungi mereka ini daripada dieksploitasi dan menjadi mangsa gangguan seksual. Ibu bapa seharusnya peka mendengar dan berani bertindak dalam menangani kes gangguan seksual kanak-kanak.
  
14. Pendedahan awal dan Pendidikan seksual perlu didedahkan kepada anak-anak sejak kecil lagi dalam usaha mendidik mereka agar dapat membezakan antara sentuhan selamat

dan sentuhan tidak selamat. Sebagai ibu bapa, kita perlu mewujudkan persekitaran yang mana anak-anak bebas untuk berkongsi dan bersuara tentang pengalaman harian mereka.

15. Dengan cara ini, ibu bapa dapat mengesan jika berlaku sesuatu yang mencurigakan atau perubahan yang berlaku kepada perilaku anak-anak.

16. Di pihak Kerajaan pula, Kementerian Pembangunan Wanita, Keluarga dan Masyarakat (KPWKM) telah menggubal **Akta Antigangguan Seksual 2022 [Akta 840]**, sebagai suatu **Akta khusus untuk menangani kesalahan gangguan seksual**.
17. Akta ini diharap dapat membantu mangsa untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada mangsa.

18. **Penguatkuasaan Akta** telah dilaksanakan **secara berperingkat mulai 28 Mac 2023** yang melibatkan takrifan gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.
19. Berdasarkan pendekatan Islam, mencegah adalah lebih baik dari merawat. Oleh yang demikian, salah satu cara untuk mencegah gangguan seksual menurut Islam adalah dengan mengamalkan etika pergaulan antara lelaki dan perempuan.

20. Antaranya ialah menahan pandangan yang mana dalam pertemuan antara lelaki dengan wanita, mereka perlu menjaga pandangan agar tidak timbul niat yang tidak baik untuk mengelakkan fitnah.
21. Seperti yang difirmankan dalam ayat 30 surah An-Nur, Allah mengingatkan kaum lelaki agar menyekat pandangan mereka dari melihat yang haram dan menjaga kehormatan daripada melakukan zina.

قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ ذَلِكَ أَزْكَى لَهُمْ إِنَّ اللَّهَ خَبِيرٌ بِمَا يَصْنَعُونَ

Katakanlah (wahai Muhammad) kepada orang-orang lelaki yang beriman supaya mereka menyekat pandangan mereka (daripada memandang yang haram), dan memelihara kehormatan mereka. Yang demikian itu lebih suci bagi mereka; sesungguhnya Allah Amat Mendalam PengetahuanNya tentang apa yang mereka kerjakan.

**(A) PELAKSANAAN PROGRAM JERAYAWARA KASIH KPWKM**  
**@ADVOKASI ANTIGANGGUAN SEKSUAL**

Puan-puan, tuan-tuan, hadirin yang saya kasihi sekalian.



22. Pelaksanaan **Program Jerayawara KASIH KPWKM@Advokasi Antigangguan Seksual** ini diharapkan agar dapat mencapai objektif seperti berikut: -

- (i) **Memberikan pendedahan** dan pengetahuan kepada masyarakat mengenai gangguan seksual;
- (ii) **Menyebarkan pemakaian garis panduan** dan notis antigangguan seksual kepada semua lapisan masyarakat;

- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan
- (iv) **Menjalinkan kolaborasi strategik** dengan semua pihak bagi meningkatkan pencegahan dan kesedaran gangguan seksual.

23. Program ini juga bertujuan untuk memberikan kesedaran, pendidikan mengenai gangguan seksual agar **budaya menormalisasikan gangguan seksual dapat dihapuskan.**

Inisiatif yang boleh dilakukan termasuk menyediakan platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja tentang tindakan yang perlu diambil jika ada aduan gangguan seksual.**

24. Di samping itu, pelaksanaan ini juga adalah **selaras dengan Akta Kerja 1955 (Pindaan) 2022 yang telah berkuatkuasa pada 1 Januari 2023** yang turut mewajibkan majikan untuk

mempamerkan notis mengenai gangguan seksual di tempat kerja.

25. Justeru, KPWKM telah membangunkan **notis antigangguan seksual** yang boleh dimuat turun melalui **Kod QR dan laman web Jabatan Pembangunan Wanita (JPW)** untuk dipaparkan di setiap organisasi termasuk premis awam dan swasta.

26. KPWKM juga turut melaksanakan Bengkel Kejurulatihan bagi Anti Gangguan Seksual melalui Institut Sosial Malaysia. Objektif pelaksanaan bengkel ini ialah untuk: -

- i. **Memberikan kefahaman dan pengetahuan** kepada bakal jurulatih mengenai Akta Antigangguan Seksual 2022 (Akta 840);
- ii. **Meningkatkan kefahaman dan kemahiran** bakal jurulatih berkaitan isu antigangguan seksual (AGS);

- iii. **Meningkatkan kefahaman mengenai dinamika pendidikan andragogi** dalam penyampaian ceramah yang berkesan mengenai AGS; dan
- iv. **Menambah baik kaedah penyediaan** instrumen latihan dalam pengajaran dan pembelajaran *Training of Trainers* (TOT) AGS.

27. Bengkel ini dilaksanakan di enam (6) Zon iaitu di Utara, Tengah, Selatan, Timur, Sabah dan Sarawak. Sehingga Ogos 2023, sebanyak empat (4) siri bengkel yang melibatkan seramai 124 orang peserta telah dilaksanakan dan masih

berbaki 10 siri lagi. Para peserta yang berminat boleh mendaftar di reruai pameran ISM yang ada di sini pada hari ini.

28. Selain itu, Program Jerayawara KASIH KPWKM @Advokasi Antigangguan Seksual juga bertujuan untuk menguar-uarkan penyampaian perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga dan Masyarakat melalui pelbagai aktiviti dan reruai pameran yang disediakan.

29. Antara jabatan dan agensi di bawah Kementerian yang terlibat adalah Jabatan Pembangunan Wanita, Jabatan Kebajikan Masyarakat, Lembaga Penduduk dan Pembangunan Keluarga Negara, Institut Sosial Malaysia, Lembaga Kaunseling Negara, dan Yayasan Kebajikan Negara.
30. Turut bersama dengan KPWKM pada hari ini adalah rakan strategik Kementerian seperti Jabatan Bantuan Guaman, Agensi Anti Dadah Kebangsaan, Agensi Kaunseling dan Pengurusan Kredit (AKPK), Pertubuhan Keselamatan Sosial



(PERKESO), Bank Muamalat, Kementerian Perdagangan Dalam Negeri dan Kos Sara Hidup (KPDN), Lembaga Pemasaran Pertanian Persekutuan (FAMA), NGO Usahanita dan lain-lain lagi.

31. Selain itu, terdapat juga gerai-gerai jualan produk-produk daripada usahawan-usahawan wanita di bawah Jabatan Pembangunan Wanita, Yayasan Kebajikan Negara dan Jabatan Kebajikan Masyarakat.

32. Di kesempatan ini, saya juga memohon kepada hadirin sekalian untuk berkongsi maklumat mengenai Advokasi Antigangguan Seksual kepada keluarga, sanak saudara serta rakan-rakan sebagai usaha untuk memberikan kefahaman kepada masyarakat di dalam komuniti kita.

**(B) HARAPAN**

Puan-puan, tuan-tuan, hadirin yang saya kasihi sekalian.

33. Saya berharap dengan kebersamaan **agensi Kerajaan, sektor korporat, Badan Bukan Kerajaan (NGO) serta seluruh masyarakat untuk untuk bekerjasama** agar kes gangguan seksual akan dapat dibendung dan sekaligus **menyediakan persekitaran yang selamat kepada bukan sahaja wanita malahan lelaki jua termasuk kanak-kanak dan setiap lapisan masyarakat.**

34. Di samping itu, kita juga masih lagi di dalam Sambutan Bulan Kemerdekaan, saya mengambil kesempatan ini untuk

mengucapkan **Selamat Menyambut Hari Kebangsaan yang ke 66, dengan tema: Malaysia MADANI: Tekad Perpaduan, Penuhi Harapan.** Eratkan perpaduan antara kita dalam membentuk Malaysia yang aman dan harmoni serta kaya dengan kepelbagaian kaum.

35. Marilah kita semua bersama-sama meraikan semangat perpaduan, kepelbagaian dan kemajuan yang telah dicapai oleh negara yang kita cintai ini. Semoga semangat kemerdekaan terus tertanam dan berkobar di dalam jiwa seluruh anak Malaysia.

36. Izinkan saya mengakhiri ucapan dengan serangkap pantun:

**Ekonomi Negara Semakin Mampan,  
Hasil Kesatuan dan Hidup Harmoni ,  
Tekad Perpaduan Penuhi Harapan,  
Gangguan Seksual Mesti Diperangi.**

37. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH**

**KPWKM @Advokasi Antigangguan Seksual Negeri  
Terengganu.**

*Sekian, Wabillahi taufiq walhidayah*

*Wassalamualaikum warahmatullahi Wabarakatuh.*

**YB HAJAH AIMAN ATHIRAH BINTI SABU**

**Timbalan Menteri Pembangunan Wanita, Keluarga dan Masyarakat  
10 September 2023**